

Headline
Date
Media Title
Section
Circulation
Readership

Seks bebas remaja Britain semakin tidak terkawal

14. Mar 2009

Berita Harian

Nasional

192917

1521000

Language MALAY

Page No 33

Article Size 477 cm2

Frequency Daily

Color Full Color

AdValue 10133.45



Siti Suriani Othman
Dari Nottingham, England
suisa3979@gmail.com

Seks bebas remaja Britain semakin tidak terkawal

SATU kajian dijalankan di London yang pernah disiarkan *Berita Harian* baru-baru ini mendapati kecenderungan remaja mencari maklumat mengenai pencegahan kehamilan dan seks adalah antara pola baru pencarian bahan daripada internet. Pola ini secara tidak langsung mencerminkan realiti yang memperlihatkan Britain sebagai negara dengan kelahiran bayi oleh remaja tertinggi di Eropah.

Ironinya, dalam kemeleut tanpa penyelesaian ini, kerajaan belum pernah secara langsung menyarankan supaya masyarakatnya kembali kepada agama, malah tidak melihat itu sebagai antara puncanya. Promosi penggunaan kondom dijalankan secara berleluasa, termasuk di universiti serta minggu kesihatan seksual diadakan di universiti untuk menjalankan kajian kesihatan penyakit seksual kononnya dapat 'memperbaiki' keadaan.

Satu perkara yang mereka tidak sedar adalah tindakan mereka itu sama seperti menutup bangkai tetapi baunya akan tetap menusuk deria. Dalam kajian tinjauan yang pernah dijalankan di Britain, 90 peratus remajanya mengaku pernah melakukan hubungan seks dan suku melakukannya sebelum berumur 16 tahun.

Remaja yang mengandung luar nikah pula meningkat sejak 1960 dan memuncak pada 1970-an. Lebih terkini, statistik menunjukkan 63 peratus daripada 45,000 remaja yang melahirkan anak di Britain pada 2006 adalah anak luar nikah. Daripada jumlah ini, 1,200 adalah remaja di bawah 16 tahun.

Kadar pengguguran bayi juga terus meningkat. Pada 2006, sejumlah 214,000 remaja menjalankan pengguguran - yang menunjukkan peningkatan berbanding tahun sebelumnya. Malah, sejurus selepas Kerajaan Britain meluluskan akta membenarkan pengguguran pada 1967, 55,000 kes menggugurkan anak dicatatkan.

Bagaimanapun, hal ini tidak disukai semua pihak. Satu tinjauan yang pernah dijalankan menunjukkan 55 peratus wanita yang disoal menyatakan terlalu banyak pengguguran berlaku di Britain dan kerajaan perlu mengambil langkah segera untuk mengurangkannya.

Perlakuan seks bebas bukan hanya membawa kepada masalah pengguguran di kalangan remaja, malah turut mencetus pelbagai penyakit kelamin yang membunuh. Kajian oleh Perkhidmatan Makmal Kesihatan Umum menyatakan kesihatan seksual di kalangan remaja di England dan Wales semakin teruk sejak 1990-an.

Untuk jangka panjang, mereka terdedah kepada penyakit seperti kanser servik, ketidaksuburan dan HIV. Pada penghujung 1990-an, remaja perempuan yang mengidap gonorea meningkat sehingga 35 peratus dan 31 peratus bagi remaja lelaki. Begitu juga penyakit kelamin chlamydia turut meningkat 17 peratus di kalangan remaja perempuan dan 18 peratus bagi remaja lelaki.

Gonorea adalah antara penyakit kelamin utama di dunia. Pesakit yang tidak dirawat boleh menyebabkan bakteria merebak ke seluruh badan dan jika mengandug, boleh membawa kepada keguguran. Pesakit juga terpaksa menghadapi kesakitan yang amat sangat ke-

tika membuang air kecil.

Chlamydia pula adalah penyakit kelamin paling tinggi jangkitannya di dunia yang boleh menyebabkan penghidapnya tidak subur dan tidak boleh melahirkan anak sepanjang hayatnya serta menanggung kesakitan yang amat sangat ketika membuang air kecil.

Malah, bahaya penyakit kelamin terus dibincangkan dan terbaru dalam media Britain pada Februari 2009. Doktor memberi ingatan mengenai peningkatan bilangan individu yang terjebak dengan penyakit seksual berjangkit. Di London saja, 10,000 kes baru gonorea dicatatkan dan 20,000 kes chlamydia didiagnos tahun lalu. Sekali lagi, doktor menyifatkan statistik ini sebagai satu bencana masyarakat Britain. Pola baru yang muncul di kalangan remaja Britain hari ini ialah kecenderungan remaja, semuda 12 tahun untuk mencuba perlakuan seks dengan menggunakan telefon bimbit sebagai alat perhubungan yang membantu mengatur pertemuan dengan teman baru dan seterusnya 'mencuba' melakukan seks.

Sesetengahnya menawarkan diri melakukan hubungan seks dengan lebih seorang lelaki bagi menarik minat lelaki berhubung terus dengannya. Malah, dalam satu kajian yang pernah disiarkan media Britain, ada responden mengakui mereka mempunyai teman 'bersukaria' sehingga mencecah 50 orang.

Kaye Wellings, seorang profesor dalam bidang kesihatan seksual menyatakan pola baru di kalangan wanita Britain hari ini menunjukkan mereka mempunyai dua kali ganda bilangan pasangan berbanding wanita 10 tahun lalu. Wanita hari ini juga tidak takut lagi untuk terlibat dengan hubungan seks berbentuk 'one-night-stand' atau melakukannya dengan sesilapa saja yang baru dikenali hanya untuk semalaman dan kemudian 'selesai'.

Pola baru yang ditunjukkan ini membawa kepada peningkatan penyakit kelamin berjangkit dan tidak hairanlah jika HIV juga menjadi salah satu penyakit yang dibimbangi sukar dikawal di UK. Antara penyumbang utama HIV di UK adalah kegiatan seks bebas. Misalnya, pada 2007 dianggarkan 73,000 orang menghidapnya dengan hampir 7,000 didiagnos sebagai penghidap baru. Selain hubungan seks bebas, 2,700 penghidap AIDS berpunca daripada perlakuan seks sejenis.

Mungkin fakta ini menakutkan, tetapi itulah kebenaran di kalangan masyarakat Britain hari ini. Menyedari keadaan ini, marilah kita bersama-sama mengingatkan diri dan insan tersayang supaya menjauhi perbuatan terkutuk itu.

Bukan saja seks bebas dikecam agama, ia juga jelas merosakkan peluang seseorang menikmati kehidupan normal yang bahagia. Jalan yang baik sedia menanti, mengapa jalan yang buruk juga dipilih? Jawapannya di tangan kita sendiri.

Penulis ialah pensyarah Universiti Sains Islam Malaysia (Usim), kini melanjutkan pelajaran peringkat doktor falsafah dalam bidang kewartawan di Nottingham Trent University, United Kingdom.



PENGUATKUSAAN berterusan di Malaysia berjaya mengawal dan mengelak remaja daripada terbit gejala tidak sihat.